

澄城縣志卷二十

金石<sup>上</sup>

關中爲金石淵藪澄邑又近屬三輔碑版遺畱當不缺然舊志遺而不錄新志語焉不詳遂使吉金壽石湮沈于荒榛斷壟也久矣采輯之攷正之一物之微亦有足徵時代者洪邁隸釋趙明誠金石錄體例俱在可昉而撰述也至如唐杜牧功倉戶尉廳壁記無石刻者與有而石已亡者鴻章具在類歸藝文而所載則概以元代爲斷網羅蒐獵哀然有成書矣

魏

暉福寺碑

澄城縣志

卷二十

金石上

一

太和十二年歲在戊辰七月己卯朔一日建正書額篆大代宕昌公暉福寺碑上豐下銳首有穿無撰書人姓名在北時村寺內文見左

夫元宗

缺二字

非名相之所詮至韻沖莫非稱謂之所攝妙

絕稱謂微言以之載揚體非名相圜像以之而應故羣有殊致道以經焉萬流競津法以紀焉是以神曦騰曜鏡重昏于大千三乘肇唱拯沈黎于炎宅用能慈洳流于當時惠慶光于曠劫自世道交喪靈燭潛暉攸攸羣夢靡照靡矜我皇文明自天超世高悟鼓淳風以懷萬<sup>缺一字</sup>灑靈澤以霑九服兼遐想虛宗尊崇道教太皇太后聖慮淵詳道心幽暢協宣皇極百揆挺惟新之明緝熙庶績八表流擊

壤之詠雖智周卅紀而方外之志不虧形應萬機而恬素  
之眞弗擾故能優遊紫宮憲章遺法紹靈鷲于溥天募祇  
桓于震碑作振旦非夫天縱在躬量齊虛受其孰能英風藹  
而重扇元猷淪而再揚哉散騎常侍安西將軍吏部內行  
尚書宥昌公王慶皆資性明茂秉心淵懿位亞台衡任摠  
機密翼贊之功光于帝庭忠規之節彰于朝司每惟奮施  
之誠罔申謝生之勲莫報庶馮冥津元期有寄乃穀竭丹  
誠于本鄉南北舊宅上爲二聖造三級佛圖各一區規崇  
爽塏擇形勝之地臨沃衍據條剛面修獻而帶洛川佩黃  
河而負龍門伐良松于華畎之陰掇文瑤于荆山之陽旌  
功銳巧窮妙極思爰自經始三載而就崇基重構層櫺疊

澄城縣志

卷二十

金石上

一一

起法堂禪室通閣連暉翠林淥流含榮遞暎蔚若靈椿之  
茂春陽嵬若翔雲之籠缺一字汜金儀赫曜彩絢光備覩之  
者則澄發道心藻除塵垢悒元者則陶眞煉和遺形忘返  
諒罕代之神規當今之壯觀者矣夫功高德盛徽聲播于  
管弮業隆曠載利迹流于後昆所以光宣軌摹永垂不朽  
故姻舊慶慈善之至邑里感惠訓之誠遂鐫石立言式揚  
暉烈庶洪因鍾于聖躬微津延于先住其辭曰淵哉沖猷  
微矣虛宗昏邪交扇氛徒競鋒有覺爰興超悟神蹤志勲  
淨境開拯塵蒙於顯大代長發其祥景運承符世有詰王  
后皇高悟道風載揚哀此羣或照彼祈鄉化因道感道由  
人敷悃悃安西秉德陳謨冥期幽屬齊茲靈圖曾是暉福

慶宗皇居爰建靈寺妙契天規飛欂雲翔浮櫺籠曦金儀  
燭曜功殫世奇蔚如崑峰瓊若珠麗閑堂寂寥禪室虛沖  
朱櫺吐霞翠戶含風僧徒遊宴幽宗是融心栖化表形寓  
俗中靈津匪遠字缺二則鏡蛻神豈緬藻荃則淨庶運微因  
慶鍾皇聖爰覬先慈永超塵徑

玉麟按碑後書太和十二年歲在戊辰七月己卯而無撰  
書人姓名晉帝奕以太和紀元而在位僅及五年唐文宗  
亦號太和乃九年後又改爲開成元年則正史並無太和  
十二年也如於上一字少有模糊強爲牽就則晉之永和  
十二年歲在丙辰唐之元和十二年歲在丁酉此外凡以  
和字紀年者如晉之咸和宋之景和唐之中和趙宋之政

和宣和亦無至十二年者舊志未收此碑而以暉福寺建  
立之年屬之于宋誤矣况北魏之稱大代趙明誠金石錄  
已備言之考宋蒼梧王四年丁巳爲北魏孝文帝太和元  
年至齊武帝六年戊辰實爲北魏太和十二年七月朔己  
卯今以魏書證之十二年正月朔辛巳中間歸奇二日正  
符合也至文中所稱太皇太后則文明馮皇后也孝文卽  
位馮太后臨朝稱制至太和十四年始崩文所稱爲二聖  
造浮圖亦等祝釐之義初非冥福之資矣宕昌公王慶岢  
爵里史無可考然文言本鄉舊宅或卽澄人未可知也書  
闕有間歟能無惜焉北魏碑版流傳絕少如此搨者不能  
不屬之拓跋氏也韓陵片石之歎庾開府何獨取一温子

昇哉

隋

碑銘殘額

正書題大隋同州儀同姑臧郡太守成公字缺三銘下截則

明嘉靖二十九年所刻上人主墳塔記應係磨去重鐫而

猶畱碑額爾在酥酪村普照寺內

玉麟按隋書地理志姑臧縣名屬武威郡注舊置武威郡

開皇初廢大業初復置武威郡是開皇時皆為姑臧郡而

成公乃大業以前人也惜文已磨去難于考究矣

石像殘碑

無年代及撰書人姓名前題大隋南宮縣令奉車都尉雷

澄城縣志

卷二十 金石上

四

明字缺一石像之碑正書在馬村清涼寺內文見左

君諱洪郎夫冲宗幽德字缺一經教超遷神邁久字缺一後遠

字缺四惠字缺八通感修善歸全字缺四山字缺二石像畱字缺一銘

曰父母為人字缺一克樹立字缺一波將軍奉車都尉恒念慈

心洞曉禪堂禮佛誦經炳心無二字缺一年八十字缺一加字缺一

字南宮縣令真心契意重皈三寶年將八十七字缺一祖法

生文能明辨任內部郎字缺一鎮將曾祖字缺一摠管內部字缺一

字乃使字缺一人字缺一山字缺一若神就觀者駭其奇異字缺一

稱其妙矣字缺一金至其字缺一未比之字缺一可謂釋迦重應

于字缺一大字缺一品字缺一代窮字缺一至妙字缺一言非盡藉此

字缺一因字缺一涅槃妙字缺一法界字缺一妙門字缺一雄俊

缺二 謙敬 此下餘石尙應有  
五行無一字可見

玉麟按此碑湮沒既久知者絕少石質亦剝蝕過甚而字體瘦勁處已具歐柳宗派惜無可證明耳碑額相傳有石刻佛像爲好事者鑄竊以去考金石粹編載有此文較此多十餘字而於首行明字下作府字今細撫之頗不似次行君諱洪郎處又空一洪字且自記不知碑在何地是所見亦非全本惟後註大業五年實足徵信耳孫星衍預修邑志而所著寰宇訪碑錄乃以爲碑在南宮縣則耳食之誤矣

唐

佛頂尊勝陀羅尼經石幢讚文

澄城縣志

卷二十

金石上

五

太和四年五月立太原王簡能撰文隴西李季文正書在歸安村壽聖寺內文見左

觀乎佛理元微非至人莫能探其奧旨法性凝寂非達人孰能究其真諦則我天人師觀瞻部之內業障累重習氣根深懷拯溺之舟起慈惠之楫指善住爲證明不生七返以波利爲洪濟永斷三途厥有居士王公允及夫人隴西李氏悟浮生之不永測泡幻之非堅咸願虔誠同心合志建不朽之寶幢則廣施福祐刻永劫之文字則利益存亡覩之者自得生天聞之者免其災禍先將賜果答父母之劬勞後藉餘光爲已身之船楫又能棲心佛理靜慮蹄筌

碑作  
荃

高卧煙雲澄神恬泊唯覺路之可歸依信摠持之可

攝受捨嗜慾之心節衣資之費召良工斲荆山之玉建茲是幢削崑崙之峰長標角立銘曰唯彼真經有大威靈扶苦拯溺出幽入冥瞻三途而夜懸明月臨沙界而日照衆星破宿障而雲銷霧卷起厚信而罪滅福生如來真偈演說摠持靜風波海岳動天地神祇震雷音而怖魔潛伏覩龍德而猛虎收威甘露遍灑醍醐微滴霑一飛塵洗恒沙隙證解脫門住不思議力冀千秋兮不朽徵萬古兮遺跡海變桑田經畱功石

玉麟按此幢舊志不載關中金石記亦未收雖甚磨泐其字蹟尙可辨認後署王官鄉歸安村證以圖經亦見地名之由來久矣經文則漫漶過多難于成讀經序云此本以

永淳二年自西域入京是唐高宗時也明趙岫石墨鐫華載所藏唐陀羅尼經石幢搨本至十一紙之多惟劉愼微僧無可所書二本最佳餘無姓名郭宗昌金石史所收咸通本又係劉鏞書則關中石幢鐫是經者不一而足要皆唐人手筆惜冷落荒山千百餘載無一賞鑒者表而出之可太息也

澄城令鄭公德政碑

貞元十四年正月立陳京撰文鄭雲達正書姜元素篆額今在縣南門外魏鄭公祠內文見左

在昔兩漢之政咸勤東京之事最明共理邦邑必難守宰不獨孝宣二千石之選也我國家宏啟至化稽對前謨領

縣掄才自邇敷遠實先三輔載首屬城恒甯厥人多及于  
理不有卓異曷颺頌歌未通神明誰鏤金石由是貞元十  
一年秋閏八月十七日辛巳詔諭銘紀左馮翊澄城令鄭  
楚相功德于其理所之南門也澄人謂余方從郎謬跡書  
殿飽循吏之事業聆采詩之風謠求成其文實美公焉公  
字叔敖鄭州滎陽人高祖元胄皇朝散大夫祠部郎中曾  
祖慈力皇朝議大夫蔡州刺史祖敬賓梓州通泉丞烈考  
琨冀州南宮尉累葉盛德咸稱能賢慶遺後人蔚變才子  
既冠試吏逢時屢遷及壯佐州遇守方缺拾紫大綬假御  
兩轡名盈利權道厭曠貴念代游之不吐去巨卿之舊儀  
遂以幅巾諸生修刺先進醇粹流藻馨香立言德成敢雄

藉奏用申擢秀才第東觀校書郎勞謁者于遺編勉訓士  
以主簿愛仙家于早歲安緱氏以彌年秩滿從調判及殊  
績授長安尉而至于宰是邑也致理大端本人和氣孝崇  
悌順心通性革當同財而離居驟撤屋而周處用簡成賦  
由平頒役諭閱廢精淪蕩俠愛俾懸衡以自占偶踐更而  
省役敏樹柔桑阜藩多稼讓鄰終畝并力從化順祈報以  
登入洽禮節而息宴井洌河闊浴汲投艱寒燠異宜男女  
半道戒鑿深厚商利遠邇會廬之義肇周八家不窮之養  
旁行四序藝蔬屢豐恒缺四諸圃者放于園公三畝俱存  
百本咸毓生生之禮備赫赫之名成鴻細必爲夙暮載考  
厚藏不散之竈盡秩有益之祠枯泉由靈而正出鷲蟲抱

義而大去此又感會元昧之可紀者也念歲孤之襦餘散  
俸廩于里舍訪善良之疾苦降服馬于鄉亭此又願懷隱  
微之可稱者也統齊多方宗詣元念臻于大稔登于洽平  
人間歲安風清雲明雞犬攸聞煙火闔境表率王甸圖像  
延城匪君子理道之至歟是皆根于研心持權端操軼倫  
先時劇幟中歲充賦疾如影響利用卷舒摛詞則宣章練  
政則居最俄函詔除褻者遂冠惠文行之其猶子康太傅  
伯師尚書之徵于馮翊崔君慎寵乃寮聞言于獻狀詢績  
以作掾于是百姓孫士良等報德誠明請命朝省而斯頌  
作焉詞曰澄有賢令兮爲鄭父文雅揚班兮學齊魯執業  
操刀兮造新部更宅闢戶兮調舊宇家多令井兮漫畦圃

澄城縣志

卷二十

金石上

八

野播膏苗兮斂鍾畝泉異貳師兮亦我樹獸同安成兮不  
吾禦西海少婦兮慎莫渡潁川四君兮敢爲伍螭龜爰伐  
兮題廣路崔巍靡泐兮偉終古

玉麟按陳京字慶復京兆萬年人事見柳州行狀所傳文  
僅數首奏議外無他著述卽此文亦奉詔而作要皆官集  
賢學上時供奉文字也碑陰有金時重修鄭公祠碑記或  
因此移實歟碑中裂石背尤剝蝕甚惟大金承安三祀冬十  
二月數字尙可識殆卽承安艾元老之所樹耶

宋

高柏廟碑

乾德三年立高陵令兼殿中侍御史李名缺撰文正書無書



人姓名在韋莊鎮廟內文見左

粵自兩曜初分辰象列而山川正三才既闢人倫辯而禮

教興于是畫地開疆各置于郡縣燔柴奉帛遂立于神祇

定字缺二 禘祫之儀明禍福吉凶之理澄城縣神泉里陵高

社高柏字缺五 相傳祭祀圖經不載其原次有三聖九郎別

殿字缺一宇聰明不測靈驗俱存字缺八 春祈秋賽朝昏不絕

于盃盤曰往月來風雨漸摧于瓦木字缺二 嚴飾曷以齋莊

大宋乾德之三載夏四月字缺二 朔二十二日居人于是各

出家財同辦功力重修蓋字缺一 三門並三殿院及三聖九

郎殿共計三十六間並已畢功斤斧既停日月咸備字缺一

梁天矯連畫棟以增光字缺五 晴煙而混迹足可示嚴廟貌

澄城縣志

卷二十

金石上

九

生靈福善禍淫無爽秉直之道五風十雨常為大有

之年府主太尉龍節不移鶴齡轉固字缺一 為父母養治瘡

痍字缺一 判官評事縣尉評事共佐同愈臻洪福字缺一 鎮字缺一

僕字缺一 施善化但立殊功享福壽以雜多荷台恩而更

久諸社人等並望家傳孝義字缺一 粟麥盈倉字缺一 歲歲桑

麻滿室干戈永息字缺一 喧擊壤之歌雨露字缺一 但覩字缺一

根之瑞刊石記事用紀歲年銘曰高柏之廟兮鎮滸字缺一

九郎之殿兮字缺一 其旁春祈秋賽兮常不絕福字缺一 生聚

兮永無疆

伏龍廟碑

皇祐六年二月建雷章撰文張天錫正書篆額在伏龍村

寺內文見左

按圖經後周伏龍神廟在縣南五十里周保定四年因神之名始置伏龍府實武衛舍兵之所也古碑斷缺文字難究惟曰有龍始見于南而北伏于此名列王號揭諸廟額神實有靈威福此方凡所祈禱應驗如響民歸事之今益尊信且自古山川土地之神有功能及于物者上自王國下逮郡邑通得祀之蓋示重本報功之禮焉耳而龍于天地間爲物最靈其隱伏顯見隨時民雖利其德而莫知其然也以故易曰潛龍勿用明隱伏之有時矣又曰見龍在田明顯見之有時矣凡陰陽變化雲雨時施氣序發育品物生成莫不由之是于山川土地之神功最爲大固宜崇

澄城縣志

卷二十

金石上

十

飭堂宇謹嚴祠事以報其功者矣里人張守清孫嗣宗等請予曰神之功德實被于民廟祀雖嚴碑壞不立以懼來世寂沒無聞遂迹其事重刻廟石庶後之觀者知神之德大庇于人矣其辭曰維神之靈應民祈禱福佑一方富壽終考春秋享祀俎羞具備更千萬年廟像無毀

呂大防題名

在匱谷石壁上正書只存五行共二十一字首行云進士  
呂次行云進士陳重三行云知縣事呂大防四行云鹽亭  
令呂五行云著作佐郎而不書年月

玉麟按舊志稱呂大防嘉祐間知縣事庚子春同兄大忠  
弟大臨尋春匱谷題名石壁考宋史呂大防登進士第爲

馮翊簿遷著作佐郎知青城縣英宗卽位擢太常博士而無知澄城縣事可補正史之缺前題進士呂或卽兄大忠也以時代論之當在嘉祐故列于此

壽聖寺牒二

一熙甯四年十月立僧惠海行書正額在歸安村寺內一紹聖四年十月立楊時中正書篆額在棘子村寺內俱熙甯二年頒牒文同不錄

玉麟按二寺皆以治平四年賜額至熙甯紹聖始立碑耳後題云右諫議大夫參知政事王者王安石也趙者趙抃也禮部尙書平章事陳者陳升之也右僕射兼門下侍郎平章事不署姓者富弼也降牒爲熙甯二年十月六日陳

澄城縣志

卷二十

金石上

十一

升之猶守禮部尙書距丙午不數日而富公罷相陳升之兼門下侍郎矣立碑則祇照原牒刊之耳

壽聖寺碑

熙甯七年五月立進士王殊撰文夷門賈永吉正書在十二曲村寺內文見左

粵自二儀肇分三才始立三才旣立乃有四民旣有四民遂分三教典其教者皆聖人也故後周武帝定之以儒教爲先道教爲次佛教爲後雖興教之時各有先後至于懲惡勸善修因致果利用之功其歸一揆若乃法象之教起自西方化流中夏開善誘之門施方便之力拯濟沈溺啟悟愚蒙立八戒之緣化其流俗設百法之要誨彼衆生洗

出六塵之心拔離三途之苦勤修因果遣渡津梁則三教之中釋氏爲最所以維摩經曰以智慧劍破煩惱由是兇人改節而修行善者篤志而歸真易俗移風助君行化矣故我大宋皇帝紹六葉之洪基應千年之景運纔登大寶潛懷慈惠之心既滿諒陰遂降蓼蕭之澤俾天下寺觀無名額久係存留及三十間已上者仰本屬州縣召民陳乞保奏朝廷當賜壽聖之名俾盛空王之化更要重修福地精選眞僧祈本枝延百世之昌薦國祚享萬齡之祐邦家永固梵宇長廡今郡主大諫閻公詢虔奉詔書欽承睿旨應有人戶陳詞懇求寺額畫時判押尅日奏聞蓋欲合彼君心共興象教字缺一菩提之勝果成圓覺之良因月魄未周勅黃已降尋頒縣鎮及下鄉村仍令邑宰張公遍行曉諭俾雕牌額各挂寺門仍令更立一碑用傳萬古庶其後輩覽此記文卽知建寺之盛時賜名之朝代故鐫翠珉永表皇恩然自古帝王皆有建立不至廣被多爲特恩其間廣被者維大唐中宗令天下建龍興之寺及明皇嗣位亦立開元之名泊至今皇普興壽聖之額故王符曰堯舜之道猶燈燭大矣哉堯舜二帝相繼而聖明光被四表亦如唐宋兩朝相繼而建立恩臨萬國者也切以殊辭非潤石學不際天頻煩主首之言請述字缺一鐫之記因抽軋思以應來求固讓無由直書其事聊紀建立年月而已玉麟按前牒方敕毀天下寺之無名額者遽又新創此寺

而以壽聖名者殆見省符所定故不嫌其沿襲歟

雷天民題名

紹聖乙亥年刻石正書在匱谷惟雷天民三月上巳及後  
年代數字尙好

李子文題名

在匱谷石壁上正書只存六行共二十九字首行云李子  
文會于次行云行邀邵正夫楊三行云直夫挈榼同四行  
云愿因幹率石五行云前一日六行云紹聖歲次丁餘俱  
頽壞

玉麟按宋哲宗于元祐八年後改元紹聖元年甲戌則此  
題乃四年丁丑書也故附此

澄城縣志

卷二十

金石上

十三

石柱刻字

凡八柱有字者六一大觀三年十月中一大觀三年十月  
二十七日記一大觀三年十月二十八日一大觀四年孟  
冬爲記一宣和癸卯五月十七日一無年月惟僧至永主

持字缺一師數字俱正書在縣文廟內

玉麟按每柱年月之下字多剝蝕所記皆施主主持姓名  
並有寺及道院等字殆廢寺故物移建于此者歟

壽聖寺石柱二

一政和元年七月立一靖康五年閏十一月立俱正書在  
十二曲村寺內

普濟寺碑

政和王辰孟冬立邑人曹景儉撰文少陵王恚正書並正額在縣西普濟寺內文見左

距馮翊郡之北九十里其屬邑曰澄城縣縣西三里澗行而南百餘步谷曰金沙有泉出于山谷之間世傳曰洗腸泉卽東晉高僧佛圖澄開脇浴腸之地也師之靈異晉記言之詳矣遼遼曠古聖跡具存高山蒼蒼流水湯湯孤雲裴回仰清風而不忘觀其圓明一鑑涵畜萬象升之可以致雲雨酌之可以愈疾病故民間水旱疢疫必禱焉應驗如響人加畏信相與勸飭創寺宇于泉上以爲大衆祈禳歸依福地大觀丁亥冬馮翊久不雪麥苗未滋且慮來歲之歉郡侯郭公長卿遣使具蒲塞之饌嚴潔致祀迎酌泉

水而供事之越翌日而瑞雪應祈闔境霑足歲迺大熟郭侯表其事于朝天子嘉賞至大觀戊子四月錫師以眞顯法師之號大觀己丑有詔毀天下寺之無名額者太守李公愼由從邑人之請具以靈泉寺屋滿三十楹之數上之詔遂不毀仍敕普濟之名以爲寺額李侯親書其榜揭示無窮亦使後世知寺獲普濟名者自李侯始也舊泉之東上皆土山其高數百尺峩嶻斬絕雖樵夫牧孺不能畱足其地邑之大姓曹師仁之所有也曹念法師神異綿歷七百餘祀今旣膺天子寵命蓋宜崇飾梵宇奉安神像使之輪煥壯麗以爲邑人美觀不亦可乎于是盡施泉上之地以爲寺址有比丘尼法遠苦形勵志力願成就命工墾闢

削土山而平之剗攘榛穢始墉始基法遠布衣一襲糲飯一盂卑辭下色謹募檀越來往城中日十數返冽寒酷暑志不少替邑人視遠之勤嘉遠之志揮金爭施樂助緣事桴棟瓴甌遐邇輦至鳩工聚材卜日而就三門峻峙兩廡翼立堂屋廚庫皆有法度粥魚齋磬罔不嚴肅東敞高閣層倚巖腹真顯之像處其下西構清軒俯臨溪流以爲士庶行樂宴賞之勝然寺踞河上高倍十丈每歲夏秋之交雨水暴漲泉之東岸旋葺旋壞大觀庚寅汶陽王公浹授天子命作宰是邑或爲民祈請或行春布令捉車駐旆屢至寺下一日據軒愕視曰水所以爲東偏患者以河西巨石礮礮隱伏地中障回水勢而不得西此所以東岸受其

患也因自給俸廩募石疏鑿以殺水東之勢仍諭遠以丐化石如柱礎大者二千有奇積起爲岸以護河水泛溢之患以爲永遠堅固之利遠如大夫指閱歲而功告成自是眈眈沈沈莊嚴靜深薦香花之芬馥閑鐘磬之清音榭楠杉檜翠陰蕭森溪聲漱玉巘溜鳴琴禪侶燕坐如鷲峰之與雙林又有桃李以茂陽春之華亦有松竹以固歲寒之節夏風如焚則就濯匱谷金沙之泉秋霄氣清則坐延堯山金粟之月顧寺之興豈特法師蓮鉢一勺之水可以爲雲雨而澤萬物至于四時敷榮之景凡可以供耳目之娛者又且使人樂之而不厭也卽以利物又以便人孰不曰瞿曇氏之教

玉麟按此碑最爲完善書法亦明秀勁逸而舊志俱稱遺失故亟著之攷政和二年敕建河瀆靈源王廟碑與此同時亦係王愔書

文昌宮醮盆款

政和四年六月造正書在縣城西郭祠內

善化寺牒

正書政和五年立無書人姓名在權家河善化寺內牒文不錄

玉麟按此牒與前壽聖寺二牒多有不同且文義繁重亦當時公牘體例歟惟書法甚佳因亟著之

周衍題名

澄城縣志

卷二十

金石上

十六

政和六年刻正書在匱谷石壁上題見左

東里周衍行之因男承議郎詵知縣事遂遊匱谷政和六年二月仲休日題記

周利建題名

在周衍題名右正書題見左

奉甯周利建同弟利和利川利謙以政和丙申清明後四日侍祖父來遊匱谷解人張榮晤刻字

玉麟按政和元年辛卯則丙申卽六年也二名乃同時題特書法各異耳

土地祠醮盆款

政和七年十月造正書在交道鎮寺內



孫大道題名

在匱谷石壁上正書題見左

青社孫大道漢澤趙華國宣和甲辰仲夏念一日同訪隋  
公泉觀周公遇賢伯仲畱題